

287

Page



250

Ob

*Lat*

*7.7*



Ex Libris  
M. B. ~~Libri~~





587238-587257

Mag. St. Dr.



DIVUS  
LEOPOLDUS

PIUS

PIETATE

IN DEUM, ET HOMINES;

UTRAQUE

MORTALIBUS UNA, ET IMMORTALI DEO

CHARISSIMUS

*PANEGYRICA ORATIONE*

· CELEBRATUS

INTER ANNUA EJUSDEM

DIVI TUTELARIS

SOLEMNIA

CORAM SENATU, POPULÓQUE ACA-

DEMICO UNIVERSITATIS LEOPOLDINÆ

WRATISLAVIENSIS SOCIETATIS

JESU,



SUB RECTORATU  
ADMÓDUM REVERENDI,  
<sup>AC</sup>  
EXIMII PATRIS,

P. CAROLI  
TROILO

587244

è Societate JESU,  
Sacro-Sanctæ Theologiæ Doctoris,  
Collegii Academici ejusdem Societatis JESU Wratis-  
laviæ, nec non Almæ Universitatis Leopoldinæ

RECTORIS MAGNIFICI,

Dicente  
*Reverendo, ac Doctissimo Patre,*

P. ANTONIO BOLL

Societatis JESU,  
AA.LL. & Philosophiæ Doctore, in eadem Universitate  
Leopoldina Philosophiæ in annum II<sup>um</sup> Professore  
Regio. Publico, ac Ordinario.

*Mense Novembri die 15. M DCC LIII.*

CUM LICENTIA ORDINARIJ.

---

Wratislaviæ, Typis Academicis Collegii Societ. JESU,

Impr. Joannes Christophorus Schluncke, Factor.





## ORATIO.



**E**X quo ad solemne LEOPOLDO Babenbergensi<sup>1</sup> Austriaco laudis tributum voce pensitandum Tuo, Celeberrima Universitas, imperio evocatus sum Orator: nihil antiquius habui, atque ut idem ferè laudationis assumam argumentum, in quo versati sunt in dicendi genere exercitatissimi, quibus parem provinciam decernebas.

Elaborabant alii in eo, ut Patroni Tui speciem nobis effigièntque à pietate amabilem delinearent non ad ostentationem solum facultatis suæ, sed ad oblectationem etiam audientium, qui ea se saltèm imagine, cujus rem amplius tenere non possunt, deludi suavissimè patiuntur: alii Duce[m] pietate meritum res secundissimas, rebus secundissimis ad pietatem usum omni eloquentiæ amplitudine ità persecuti sunt, nihil ut ab iis veræ laudis detractum, nihil falsæ commendationis afflictum esse videretur: alii demum armatam Marchionis pro DEO, & populo strenuè decertantis Pietatem temperata dicendi gravitate commendabant. Ità omnes in LEOPOLDO Principem Pium vel exhibebant ad solatium, vel exprimebant ad delicias, vel ad venerationem consecrabant.

Horum ut insistam vestigiis, &, quidquid in me facultatis est, id totum LEOPOLDI Pietati tribuam, cuncta suaserunt, quæcunque Oratorem pro rostris dicturum decet expendere. Sualit locus tot aris Cœlitibus sacris plenus, ac ipsa



singulari Sanctissimi Numinis præsentia fedundans, qui laudari petit aliud nihil, quam piun; nec aliter, ac piè; suavit Tutelaris ipse, de quo loqui jubeor, cui, ut aliis appellatio Magni, Felicis, Pulchri, ita cognomentum Pii unanimi acclamatione obvenit; suavit & vos Auditores Sapientissimi, dum non de Duce, sed de Patrono piissimo à me dici voluistis.

Unde Militem alii Sanctum, hi Ducem in coelo, terraque triumphantem, illi in hominum Gubernatore LEOPOLDO Sanctum DEI Servum colant, venerentur, obstupecant: ego laudis argumentum neque præsenti loco accommodatius, neque huic Duci gloriosius, neque Tibi, Celeberrima Universitas, jucundius esse existimo, quam LEOPOLDUM exhibere Principem superis æquè ac hominibus Pietate gratiosum; Cui tam naturale erat, acceptum semper esse omnibus; quam singulare aliis, factis, dictisque nemini esse injurium. Nam si supremi Numinis expleret jussa, non adversabatur hominibus: & si his nolens adversaretur, vel hac ratione DEO placere conabatur.

Atque ut, in quo omnis mea versatur oratio, intelligatis, ita habete: LEOPOLDUS cognomento Pius. Pius, pietate in superos; Pius, pietate in homines: utraque mortalibus unà & immortalī DEO charissimus. LEOPOLDUS quia Pius, Amor DEI, id primum: Amor Populi, id alterum. Quod utrumque ut eloquar confidentius, Tuam MAGNIFICE RECTOR Gratiam, Tuam Amplissime Cancellarie Benevolentiam, Vestrum Spectabiles Decani, Eximii, Clarissimi, Doctissimique Seniores, Professores, & Doctores Favorem, denique & vestram Auditores Patientiam piè indulgete, ac favete.

Cum LEOPOLDUM vobis proponere statuo, quem dilexit Populus, quem etiam DEUS amavit, LEOPOLDUM inquam, in quo sibi homo, & DEUS æquè complacuit; illud me nē quis putet assumpsisse laudationis argumentum, quod est planissimum. Rem enim summis esse implicatam difficultatibus Principem reperire, qui factis, dictisque juvenili, & provectæ ætati, summis & genere infimis, mortalibus æquè ac Supremo Numini placeret, vel me tacente compertum & exploratum videri cuique potest. Eò namque major est Ducis labor ac difficultas vota omnium & desideria implere, quò excellentior illius apud omnes est gravitas & majestas; & quò altior dignitas, eò amplior infimis displicendi facilitas. Princeps vel ea abdicet, ad quæ humanus quemque trahit affectus, nondum metam attingit, quo subditorum omnium collinant voluntates. Sagum, togamve induat, severitatem, aut mansuetudinem exuat, aut utrumque conjungat, necdum omnibus satisfaciet; aut si hominibus probabitur, facta DEUS improbabit. Adeò durum



durum nempe est, Principem sic posse regere omnium animos, ut omnium simul seruiat voluntati. Sol, ipse siderum Princeps, seu inuideat orbi radios, seu hos largus dispenset, suos tamen semper habet maledicos & obtretractores. Rerum omnium creatarum naturam scrutare, & perscrutare, nullam reperiens, quæ effectibus suis prodesset omnibus, nulli unquam obesset.

Quod igitur affinitate insoles, raritate prodigio simile apud Vos esse contendo; illud sibi LEOPOLDUS Pietate sua vendicavit. Habes Pissimum in Patrono tuo, Amplissima Senatûs, Populique Academici Corona, Principem, cui pietas attulit sic placere omnibus, ut nemini displiceat; & sic nemini displicere, ut vel ideo DEO placeat immortalis.

Atque cum certissima ad conciliandos subditorum animos via sit, primum sibi Superorum gratiam demereri; qualem Sanctus hic Marchio Numinis amorem Pietate sua meritus sit, hoc loco discutiamus. In domicilia sua elegisse videbatur Ter Optimo Maximo DEO dicatas ædes, ut Princeps Pius Regis Regum Immortalis obsequiis propior semper assisteret; in his supplex ad aras prostratus humi se demiserat, ut animus altius ad Superos, precum suarum terminum, evolaret: ibi conscientie maculas frequentissima confessione inter defluentes ubertim lacrymas, pios amoris indices, eluerat: ibi ipso Eucharistie suscipiendæ tempore tanta pietate, tot suspiriis Homini DEI adventum tam moræ impatiens expectaverat, ut incensus DEI amore animus planè e corpore Servatori suo obuius ire velle videretur. Enère illi etiam abditi Aulæ recessus, ubi interdum in dulci sacrarum rerum meditatione quiescebat, noctu ad orandum vigilabat, ut ita tempus omne Numinis amori consecraret. Hac inflammatus pietate non modò morabatur domesticos inter parietes, sed & in publicum progrediebatur; Urbes ac Provincias, cum se solum in DEUM flagrare satis non haberet, Numinis amore succendebat; neque subditis aliter imperare voluit, nisi summo servirent Imperatori DEO; & quos maiestate præibat, hos pietatis, religionisque exemplo præcedere studebat. Utque pietatis suæ posteritati etiam relinqueret testimonia, Claustro-Neoburgensem, & sacram ad S. Crucem ædem suis divitiis exædificavit; Melicium verò quondam à Majoribus exstructam e ruinis excitavit, suisque opibus liberalitate Principe digna locupletavit; in quibus, ut ipse literis, quibus eas stabilivit, testatur, homines DEO dicati diu, nocturne amando, colendoque Numini servirent, dum ipse Patriæ negotiis inservire cogeretur. Adeo parum fortunæ e provinciis educæ ut ut amplissimæ privatis Principum commoditatibus deserviant, dum ærario pietas præest, quæ commune sibi illud habet cum fluminibus, ut dum parentem suum



fium magnum nōrunt oceanum, in ejus gremium revolvantur. Quantum jam putatis A. A. huic pietati amorem supremus rerum omnium Arbiter rependerit? quis neget LEOPOLDUM omnium maximè Numinis animo inhaesisse, cum & ipse omnia abjiceret, ut DEO firmitus adhereret.

Sed quoniam duo sunt præcipua, quibus ad amandum impellimur; perspectus alterius in nos amor, & morum similitudo, quæ mater amorum dicitur; quemadmodum Sanctus Marchio noster primum exhibuit, ubi pietate sua omnia amoris officia amato Numini exsolvit; ita alterum consecutus est, dum piam regendi rationem, quantum humana patitur conditio, à divina mutuavit. In eo verò (si licet in illo, quod infinitum est, metam aliquam humanæ solum intelligentiæ conformem statuere) in eo inquam verò æterni Numinis Pietas, qua mundo præest, posita esse videtur: ut rerum ab se creatarum naturam, & indolem certis legibus contineat; orbis compaginem arcto sibi coherentem nexu conservet; & insurgentes Elementorum pugnas componat. Atqui pietatis hujus perfectam imaginem in LEOPOLDO videmus. Ferebat ille leges, quibus collapsam disciplinam erexit, firmam jam roboravit, ruinas meditantem vindicavit ab interitu. Ardentior Austria esse debuit in sui Numinis cultu, dum quot leges, tot radios à sole suo ferventissimo accepit. Cum autem pestis nulla tam fatalis esse possit legum reverentiæ, quam inveterata morum feritas, & sylvestris incolarum indoles; hos ad humanitatem, istos ad mansuetudinem revocavit. Nève sonante classico leges obmutescerent, quarum vocibus animata respublica conservatur; effecit etiam, ut optatissima pacis otia viveret Patria, quam adversus frementes circum fines suos exercitus sola armatus pietate tuebatur. Hinc agrorum fertilitas, multitudo populi, annonæ copia, emendati hominum mores, superbus Civitatum splendor, florens reipublicæ status, quæ etiamnum tenet hæres Austria, fructus sunt posthumi pacis à Pio Principe stabilitæ.

Verùm non Pacificum modò Numen audit, cujus pium regnandi Institutum imitari voluit LEOPOLDUS: Exercituum etiam DEUS est. Maluit quidem paternam ditionem hæreditate acceptam potius felicitate cumulare, & illustrare optimis præceptis, quam triumphis; bellum tamen necessitate gerere debuit, ut hostem pietate vinceret. Jure nullo, ausu maximo, odio duce, furore comite, armis iis, quæ terram inundant sanguine, & fumantes urbium ruinas in novas flammæ scrutantur, ferro nempe ac igne Solum Austriacum invasit coronata Stephani, Pannoniæ Regis, impietas. Cædes, & funera denuntiabat. Quin imò rapinæ dæmo irreparabiles, civium excidia clade atrocia, interneciones subditorum crudelitate barbaræ, reipublicæ uni-



universæ interitum minabantur. Aded repentina, quæ nec sagacitas ipsa prævideat; aded periculosa, cujus discrimina nulla satis prudentia caveat; aded multiplici, cui vix ipsa fortitudo sufficiat, belli tempestate Austria ob-  
ruebatur. Quid jam tantos inter turbines ageret LEOPOLDUS? egit, quod divino afflatus consilio, agere debuit: eduxit primum exercitum non copiosum, sed plenum robore, qui numerum inimicorum viribus, fortitudine ferociam, contumaciam frangat constantiâ; sic militi militem, manum ma-  
nui, vim vi opponebat; ipse verò singulari certamine congreditur cum impio Duce ipso non telo instructus, sed stipatus pietate; ita paribus simul, & im-  
paribus armis occurrebat: & dum missis in cælum precibus exercitum arma-  
vit suum, hostilem sola impietate sultum debellavit. Fugit insolito pulsus impetu Rex superbus; sed fugit, servatus in pugnam alteram, in novam  
cladem, in similem LEOPOLDI triumphum, ubi, qui antea legibus iustitiæ  
fasces inclinare renuit, jam bis victus inclinare se ipsum debuit Principis Au-  
striaci Pietati. Moderamen ita suum in ingens Patriæ emolumentum piis-  
simè cœpit, promovit, confecit LEOPOLDUS; eaque maxima, quæ morta-  
libus conceditur, pia divini Gubernii æmulatione, ut & optimis institutis pro-  
viderit Austriæ, & in æquabili quiete conservarit, & malevolorum hominum  
rabiem piissimè compoluerit.

Præterea quàm proclive factu Principi fuit in moderanda republica  
Supremi Regnorum, Regum, Cæsarum, & Sæculorum Omnium Regis, ac  
Imperatoris DEI pietatem imitari; tam expeditum habuit divinas perfectiones  
cæteras æmulari. Atque ut de ejus clementia, qua, Oratore teste, nulla  
re propius ad Superos accedimus, taceam; quis penè infinitam ejus in re-  
gendo Prudentiam, in agendo Providentiam, in ordinando reipublicæ statu  
Sapientiam; quis in rebus excogitandis alacritatem, in exequendis facilita-  
tem, in constitutis firmitatem poterit non dicam exornando, sed vel recen-  
sendo assequi? quæ deinde Ejus in decernendo æqualitas? quæ in judicando  
iustitia? quæ fortitudo? quæ lenitas? quæ in omnibus constantia? Constan-  
tia inquam, qua vel sola, cum nihil homine inconstantius, ita mortalium  
ordinem transcendit, ut nescio quid divini spirare inciperet.

Qua enim in re DEI immortalis Majestatem amplius aut colimus,  
aut admiramur, quam Eum in tanta rerum vicissitudine, mutabilitatèque im-  
mutabilem semper permanuisse, ut quem antea sæculorum series nunquam  
incipientem viderat, hunc neque præsens crescentem, neque deficientem ven-  
tura, omnis verò ætas eundem, & in suarum perfectionum plenitudine im-  
mobilem sit demaratura. Quod si ita est: in quo DEI imaginem melius  
formatam, atque in LEOPOLDO suspiciemus? quem neque sinister casus de-  
deje-



dejecit, neque secundas erexit; qui idem sibi semper constitit, cum in DEO, quem sibi vitæ statuit exemplar, firmissimè pius consisteret. Quis jam fieri posse credat, ut DEUS tam fortem virtutum suarum sectatorem, tam divinarum perfectionum, quantum homini fas est, studiosum non amet, non in deliciis habeat? eum vel maximè, à quo ipse summa semper exceptus est pietatè, obsequio, amore.

Et verò præclara certè divinæ in eum Benevolentia testimonia sunt urbium, ac provinciarum ipsi subditarum salus, fortunarum abundantia, civium pax ac tranquillitas, copiosa progenies, longa Posterorum series, quibus in vita: & infinita propè miracula, quibus post mortem est condecoratus. Verùm dixisse sufficiat: LEOPOLDUM eum se Pietate exhibuisse Principem, quem DEUS non posset non amare. Jam humanus in LEOPOLDUM populi amor in contentione vocetur.

**N**olim existimetis A. A., dum de captanda hominum benevolentia apud vos disseram, me de vano illo hominibus placendi studio disputare, quo mortalium nonnulli ità toti vivunt aliis, ut commodis propriis mori non exhorrescant: id quod prudens quisque turpe ac insanum semper habuit. Quid enim aliud est vitam, fortunas, animam adedò ipsam in benevolo aliorum studio constituere, quàm magnificam, ingentemque molem infirmo, humilique fuleimento committere, ut certiùs corruat: aut mollem, teneramque compagem aquæ immergere, ut citiùs disfluat, & conteratur.

Alia longè erat in LEOPOLDO animorum conciliandorum ratio; dum sic charus volebat esse aliis, ut simul DEO charissimus existeret; sic viribus, opèque humana niti, ut firmiùs in DEI potentia, bonitatèque consisteret. Pietate gratiam Numinis demerebatur; Pietate etiam sibi amorem populorum voluit comparare. Illuc tendebant piissima Ejus in pauperes liberalitas, piissima in subditos bonitas, piissima in omnes clementia. Quibus ille virtutibus Pietatis sociis id tandem effecit, ut nulli non esset in deliciis, boni omnes illum ut Pium Patrem complecterentur, mali verò sic ejus justitiam extimescerent, ut de Ejus mansueta pietate sibi quàm plurima, & quàm maxima pollicerentur.

Jam cum in bonos, malosque omnia hominum genera distribuantur; rem confectam habeo, si LEOPOLDUM eum fuisse Principem ostendero, qui ad bonorum, pessimorumque gratiam ità piè vixerat, ut inevitabili necessitate adducti Eum amarent omnes, nullus unquam odisset.



Præcipua Principum virtus clementia est, & liberalitas. Hæc Princeps facit; & quos invenit supra hominum vulgus, & omnem dignitatis excellitatem attollit, & cum nullus iis in orbe par sit, Superis ipsis æquales reddit. Quod si vim illam nunquam investigatam, quæ magnes ferrum allicit, sibi quæ arctissimè adstringit, nunquam satis obstupefcebamus; quæ mens, quæ ratio poterit comprehendere, quo pacto fiat, ut Principis bonitate aut munificentia eidem subditorum corda non modò conjungantur, sed in unum etiam cum eo coalescant. Probos & optimè de DEO, de republica meritos amplissimis Princeps afficiat muneribus; nemo bonus erit, qui non eum ut oculum suum, aut si quid oculis est charius, diligat, & tueatur: in mulctandis reis comitatem & facilitatem gravitati suæ severitatique adspargat; nemo malus erit, qui non apertè dicat se in iudice Patrem & invenisse, & amare. Quid mirum igitur, si boni omnes incredibili studio LEOPOLDUM prosequerentur, cum profusissimè pia fuerit ejus largitas & beneficentia? tam copiosas ille dignitates, munera, opes in alios contulit, ut miraretur quisque, unde ille inexhaustum adedò haberet largitionum fundum; LEOPOLDUS verò eum infinitum non esse quàm maximè doleret. Nemo tum erat, in quo solertiam in artibus addiscendis, contentionem animi in scientiis, assiduitatem in laboribus requiras: omnes suis se exercebant operibus, ille novitatibus inveniendis, hic expoliendis antiquitatibus studium, & operam omnem impendit: arma miles, libros eruditus, artifex quisque artem suam sic adamabant, ut, ubi totos in ea desudassent dies, noctes etiam consecrarent; certi nempe se laborantibus suum quoque Ducem laborare, qui subditorum sudores, ac vigilas meritissimis præmiis, ac dignitatibus exhilararet. Et verò spe sua adedò non sunt delusi, ut eam etiam munera multitudine, & magnificentia superârint. Ità mercedem labori debitam recipere mercenario tribuebat; ampliora meritis dare Ducis esse æstimabat. Tam profusa Principis in donando beneficentia qua debuit in amando subditi liberalitate compensari?

Sed fuerit LEOPOLDUS in literatos, fuerit in homines bene de se, de republica meritos beneficus: an eadem quoque in miseros, & calamitatibus pressos usus sit benignitate, hoc contendere oportet. Et sanè videbatur LEOPOLDO ærumnosos inter infortunatosque homines campus sibi apertus, in quo cum Trajano, aut Tito de pietate, liberalitatèque decertaret. Cum adhuc intrâ juventutis annos ejus versaretur ætas, jam in illo misericordia, pietasque redundabat; at dum ad solium extolleretur, in innumeros se gratiarum fontes ac rivulos, unde miser quisque levamen hauriret, effundebat; roris instar, qui quò altius assurgit, tantò copiosiores sese in imbres profundit.



Aditus ad illum patebat omnibus: veniunt petentes? omne habuit momentum gratia; miseri aliqui veniunt, & calamitosi? scelus putabat se in eos non esse pium, aut beneficium. Neque jucundius unquam credo fuisse spectaculum, quàm videre LEOPOLDUM, dum ille aure benevola de sua querentes fortuna exciperet, flentibus lacrymas abstergeret, pusillanimes solatiis levaret, desperantes erigeret, omnes denique Ipse, omnibus omnia factus, pietate, clementia, liberalitate sustentaret. Quare gravis erat non nullorum ab Eo recedentium oratio: nos saucios recreavit, nos opibus donavit: hoc Duce ærumnas fregimus, gaudia retulimus: nunquam adeò calamitates nostras doluimus, quàm sibi eas cordi sumpsit Ipse, cum clemens, tum largus. Hoc quanti putatis esse ad commendationem Ducis, ad gloriam LEOPOLDI? nempe sibi Ipse natus videbatur, & in folio constitutus ad salutem innocentium, ad opem impotentium, ad auxilium calamitosorum. Omnes igitur calamitosi esse volebant, ut suo, quem charissimum habebant, fierent Principi chariores.

Infinitus sum, si recenscam, quam ille in pauperes adhibuerit liberalitatem. Nam quod orbis Servator Christus pronuntiavit, hoc altissimè LEOPOLDI animo defixum semper hæsit: in paupere DEUM semper ut cognoscas. Hinc prompta illius omnibus succurrendi voluntas, hinc aperti in subsidium thesauri, hinc exhausta ferè ad sublevandas ipsorum fortunas æraria, hinc illorum cura propemodum sollicita, dum ipse non rarò ægris sic omnia ministraret, sic de omnibus provideret, ut velut pauperum famulorum unus salutem suam posteriorem salute ipsorum ducere videretur. Ipsi quæso videte, & perspicite, qua ille pompa, qua comitante caterva ingrediatur: quàm gressum figit, sequuntur inopes; ubi consistit, ibi ad pium Principem stant importuni pauperes: quo iter destinat, illuc jam omnis ex omni latè regione egestate pressus confluisse videtur. Non miror Auditores, quod temerarius non nemo alienigena LEOPOLDUM pauperibus stipatum prætervehi videns dicere ausus est: aut Principem esse pauperem, aut avarum, qui nè famulos quidem magnificentius convestiret. Non enim dignitatis amplitudinem è longo famulantium ordine metiri licuit, sed inopum hominum circumfuso agmine fores obsidentium; non è festivis inter aularum atria clamoribus, sed pauperum gemitibus, licèt & isti diu audiri non poterant, quos continuò in gratiarum actiones pia liberalitas convertit; non denique è splendido in sui commodum & exultationem apparatu, sed ingenti cura, atque sollicitudine, qua afflictam egentium sortem solaretur. Nempe montem antè radicibus, terram centro, quàm à LEOPOLDO pauperes avelles. Miseratio LEOPOLDI Solem imitabatur astrorum omnium beneficentissimum, qui



6  
qui vapores terræ attrahit, non ut sibi colligat, sed ut in arescentem subinde terram effundat. Jam si, teste Seneca, officia etiam feræ sentiant, nec ullum tam immanis sit animal, quod non cura, ac beneficium mitiget, & in amorem sui vertat; quis studia, quis officia, quis optimas subditorum in LEOPOLDUM voluntates dicendo complectetur? ego certè sic mecum statuo: jucundius nihil fuisse, quàm LEOPOLDUM, subditosque videre, quibus illi mutuis inter se certarint officiis; ille munera, hi gratias cumulando, uterque mutuum amorem prorsus incredibilem referendo.


Sed quid tandem habet admirationis à bonis pium, liberalémque amari Principem? Eum vel ab improbis non posse non amari, hoc in LEOPOLDO tam singulare, quàm exploratum est. Nemo judicare, nedum comprehendere poterat, quam vim incredibilem, & propè singularem ejus habuerit severitas, quæ, dum terrorem improborum animis injiceret, nil nisi benevolentiam, studia, amorem reportaret. Scilicet consceleratissimus quisque, & in omni flagitiorum genere volutatus, si omnem boni, rectique amorem abjecisset, odium tamen LEOPOLDI sibi non imperaret; cum mitissimus Princeps, si severum induere judicem cogeretur, misericordem, clementémque Patrem exuere non posset. Neque tamen velim existimetis LEOPOLDUM tam fuisse facilem, ut in omnibus conniveret; neque tam levem, ut tacitus omnia negligeret; aut nimia cum clementia tam incurium, ut scelera impuè grassari pateretur. Mellis quoque suos habuit admixtos aculeos, quos in delinquentes tam felix torqueret, ut iis audacem peccandi licentiam prosterneret, reorum simul corda sui amore configeret. Nam si pro tribunali sederet, aut scelera, si vulgo non essent nota, graviter reprehensa celaverat; aut certe supplicia, si fas esset, minuerat; clemens semper & mansuetus, si plecteret, & si condonaret. Si crimine aliquis in summum capitis discrimen arcesseretur, quæ tum cura, quæ sollicitudo Marchionis, ut in crimen cum justitia inquiratur, de inquisito cum clementia judicetur, de judicato cum benignitate decernatur. Mors denique, si decreta foret, tum LEOPOLDUS Summa cum justitiæ veneratione misero indolere, sententiam, si posset, lacrymis extinguere, Ipse denique antè duplicata amoris, & doloris morte emori, quàm unâ maleficus moreretur. Cum tantam in judiciis mansuetudinem, tam inusitam inauditamque in ferendo necis suffragio clementiam viderent rei; ita sunt erecti, ut fortunarum ablationem, supplicia, vitæque interitum alacri, fortique animo perferendum putarint. Sic nempe, cum severitas deposceretur, vicit naturam LEOPOLDUS; & tam vehemens fuit, quàm cogeatur, non quàm volebat. Præsidio omnibus etiam alienissimis, vix cuiquam exitio esse exoptabat; quo factum, ut dicerent nonnulli:



nulli: præstare LEOPOLDUM lædere, & veniam petere, quàm nunquam offendere. Neque eorum, qui tam pios liberalitatis & clementiæ fructus in momenta percipiebant, aliquis fuit, qui ejus Pietatis famâ majora longè se comperisse non profiteretur. Omnibus, subditis & alienigenis, probis æquè ac improbis una vox erat: piè liberalem, piè clementem, hoc est: omni pietate in homines absolutissimum Principem Austria habet in LEOPOLDO. An luculentius requiri possit testimonium, quàm quod ipsa confert etiam impietas? nemo negabit has laudes esse veras, quas illa asserit: fallere potest hostis, dum accusat; nunquam sefellit, dum laudat. Quare nihil nos jam moratur, neque audientium animos morari potest, quin in eam nobiscum sententiam abeant, LEOPOLDUM ob munificam ac clementem in omnes Pietatem, Patrem Patriæ, populi delicias, Austriæ gaudium, Imperii vitam, orbis amorem, & si quid majus est, ex vero dici oportere.

Quid tandem dicendum restat, ubi incredibilis LEOPOLDI in mortales non minùs ac Superos Pietas totum penè cum amore sermonem exhaust. Sufficiat, quod Divo Marchioni suo Austria debuit, Pietas innata contulit, hoc Eidem acciuere præconium: LEOPOLDUS cognomento Pius. Pius, pietate in homines: Pius, pietate in Superos: utraque mortalibus unà, & Immortali DEO Charissimus. Nec plura: sed ad Te se mea convertit oratio Celeberrima Universitas! Tuæ modò, & quandoquidem tuus esse meo, meæ etiam atque etiam felicitati gratulor. Habes in LEOPOLDO, Quem dare pro imperio tuo ac dignitate singularem non potui, Intercessorem, Cui omnem debes & amorem, & venerationem. Fortunatissimam Te omnes gentes prædicabunt, si cultu, quo nulli etiamnum cesseras, piissimum semper ornaveris LEOPOLDUM, Quem demeritis meis minùs Pium


D I X I.













D № 367880

\*KSIEGARNIA\*  
ANTYKWARIAT



D № 367880

XXXXXXXXXXXXXXXXXXXX

Biblioteka Jagiellońska



stdr0026255



Pic. 24  
24 g.

zakonie.